

■ GLOSSA

Il pur soveran porta sloggi

Patratgs davart nischas per purs lumnezians

DA CLAUDIA CADRUVI / ANR

«Nunpussaivel», pens’jau l’emprima giada ch’jau vom cun auto sper il placat ora. «I na sa betg esser.» La segunda giada ch’jau pass, guard jau pli precis: «El sumeglia giud chau il Renzo.» E la terza giada, parchesch’jau l’auto, turn tar il placat e constatesch: «Igl è Renzo!» El vesa ora coga bain e coga sexy. Ma jau sun trumpada.

Cura che Renzo Blumenthal ha guadagnà il titel dal «Mister Schweiz», ma sun jau legrada. I m’ha fatg da narr plaschair che tut quests schischis che fan l’entir di mo body-building han stuì succumber. Ed in um che lavura en la natira, in pur, ha guadagnà! Quest fatg m’ha laschè crair che concurenzas da bellezza n’èn forsà tuttina betg uschè banalas

Ma uss? Uss fa Renzo Blumenthal, il pli bel Svizzer, reclama per chautschas suten. E mias pitschnas illusiuns liuan sco in toc glatsch en la Sahara. Ma pertge sun jau talmain trumpada? In „Mister Schweiz“ n’è betg in apiestel da morala. El è vegnì elegì perquai ch’el ha in bel corp e vesa ora bain. El è quasi predestinà per far reclama per chautschas suten.

Sco bunamain tut ils auters enconusch jau Renzo Blumenthal sulet ord intervistas en las medias. Là ha el adina ditg ch’el veglia restar fidaivel a sasez, veglia far reclama per sia vallada, per products natirals etc. Ma probabel gudognan ins meglier cun far reclama per sloggi che per chaschiel e liongias da la Lumnezia.

Tgi sa quant ch’il pur soveran ha inchassà per posar en chautschas suten avant la camera? Speranza bler. Sche Renzo Blumenthal sto schon bittar tut sias devisas e ses principis per il tempel en, lura lain sperar ch’el vegnia almain pajà bain persuenter.

Ed in summa. Als purs vegn ozendi adina predegia ch’els stoppian chattar products da nischa per survivor sco purs. Blumenthal ha fatg quai a moda eccellente. El ha chattà nischas fitg lucrativas ed en il vast senn dal pled schizunt natirals. I resta sulet da sperar ch’el chattia sunter ses onn sco «Mister Schweiz» puspè la via enavos sin ses bain puril en Lumnezia. Fiss bain donn e putgà da perder per adina in uschè bel pur soveran en nischas uschè bassas da la Bassa.

